

PM nafi pilih tokoh korporat kurang kemampuan

UM 2, 1 JUN 2002

KUALA LUMPUR 1 Jun — Perdana Menteri, Datuk Seri Dr. Mahathir Mohamad hari ini menolak dakwaan yang mengatakan kerajaan memilih tokoh korporat bumiputera tidak berkemampuan dalam melaksanakan projek-projek tertentu.

Katanya, pemilihan kerajaan terhadap tokoh-tokoh korporat dalam melaksanakan projek-projek tertentu adalah berdasarkan kepada rekod kejayaan mereka sebelum ini.

Kejayaan tokoh-tokoh korporat terbabit sebelum ini, kata beliau, sebenarnya bukan disebabkan bantuan kerajaan sebaliknya bermula atas usaha mereka sendiri.

“Kemampuan mereka menyebabkan kerajaan memilih mereka,” katanya yang mengulas mengenai ‘kejatuhan’ beberapa tokoh korporat bumiputera termasuk Tan Sri Tajuddin Ramli dan Datuk Halim Saad.

Perdana Menteri selanjutnya memberitahu, kerajaan sentiasa meneliti kemampuan individu tertentu sebelum menyerahkan sebarang projek untuk dilaksanakan.

Kerajaan, katanya, tidak sewenang-wenang menyerahkan projek-projek kepada individu.

Ditanya mengapa tokoh-tokoh korporat tersebut akhirnya menemui kegagalan, Dr. Mahathir berkata: “Saya tidak tahu. Kita kena kaji”

Dalam perkembangan lain, beliau menjelaskan, Malaysia akan membuat perbandingan harga air yang dibeli oleh Hong Kong dari China apabila mengadakan rundingan dua hala dengan Singapura tidak lama lagi.

“Hong Kong terpaksa membeli dengan harga RM8 bagi setiap 1,000 galen air dari China. Jadi, adalah karut apabila Singapura hanya membeli dengan hanya tiga sen pada kadar yang sama,” tegasnya.